

# Tgi ha tema dal luf?

In luf, 75 vatgas-mamma ed in video

DA DAVID TRUTTMANN/FMR

■ **Il paster sin l'Alp Cuolm d'Andiast ha filmà questa fin d'emna cun il telefonin co in luf va tras sia muaglia. Il video po esser punct da partenza per la dumonda sche lufs èn insumma privlus per muaglia grossa, sch'ìls animals gronds pon vegnir spaventads tras in luf ed uschia metter en privel viandants? Las opiniuns en cuntraversas, cun u senza video.** Igl è capità sonda, ils 11 da fanadur 2020. *Conradin Tuor* è dapi tschintg onns paster sin l'Alp Cuolm. Gia da mat è el adina stà ad alp. In um da las muntognas, cun experientscha, senza tema d'urizis u da lufs. Però la notg sin sonda è stada particulara per el. Gia enturn las 03.00 ha el udì clamar ses «tiers». El pertgira sin l'Alp Cuolm 135 arments d'Andiast, 75 vatgas-mamma e 60 vaders. Tuor descriva la situaziun uschia: «Jau hai udì la notg sin sonda enturn las 03.00 ch'insatge n'era betg en urden, ils tiers clamavan ed eran malruassaivels.» Suenten in'ura è la situaziun puspè sa calmada. «Però la damaun a las 07.20 hai jau vis a passar il luf mo 20 meters sper mia tegia.» E pauc sissur ha Tuor filmà e commentà co il luf va tras sia muaglia.

## In film sco exempel

Il video mussa ils arments giudim ina pastgira d'alp, enserrada cun ina saiv. Il luf s'avischina als arments, las vatgas ed ils vadels van da la vart, però senza sa spaventar, il luf e las vatgas mantegnan adina in pau distanza, intginas vatgas marcan però preschientscha e fan perfin cas da vulair sa defender, vul dir d'attatgar il luf. Quel sa retira a la fin.

Il video documentescha uschia exemplaricamain co in inscunter tranter luf e vatgas-mamma capita, en ina situaziun alpestra fitg reala ed actuala. Però era quest video po vegnir interpretà differentamain. Il video ha perquai era fatg la runda sin las raits socialas ed è vegnì commentà en moda e maniera fitg cuntraversa, dad adversaris ed amis dal luf.

## Agressiv u normal?

Per Tuor mussa ses filmin ch'era vatgas-mamma pon vegnir malruassaivlas e tut



**Malegià u fotogrà? Tema reala u abstracta? – Il luf, il muvel gross e las discussiuns enturn lur inscunters.**

MALETG BEN LACK CC BY 2.0

tenor era aggressivas. Tuor n'ha betg tema per la vita da sias vatgas: «Quellas vegnan schon da sa defender ed jau n'hai era nagins vadels fitg giuvens, pli giuvens ch'in mais.» Il paster da l'Alp Cuolm ha duas autras temas: «Per l'ina pudessan las vatgas ir a frusta cun mitschar dal luf. Il territori è fitg grippus. E per l'autra, blier pli mal, fissi per mai sch'ellas mettessan en privel viandants sch'ellas vegnan spaventadas ed aggressivas.»

*David Gerke*, il president da la Grupp Luf Svizra, ha er vis il video da l'Alp Cuolm. E per el èsi cler: «Il video d'Andiast mussa bain co muaglia gronda sa cuntegna en cas dad ina confruntaziun cun il luf: Ella resta detg calma ed ella sa defenda sch'i fa da basegn.» E Gerke renviescha ch'i n'haja dà quasi nagins cas ils davos onns en Svizra nua ch'in luf avess stgarpà in vadè pli vegl ch'in mais u perfin animals anc pli gronds. Ils paucs cas, en total betg dapli che tschintg, sajan tuts stads vadels novnashids, stgarpads l'emprima notg suenter lur naschientscha.

*Gionin Caduff* da Vattiz n'è nagin ami dal luf. Quai ha el gia fatg valair pliras giadas il davos temp. El è er il pledader dals purs da vatgas-mamma ch'han scrit il favrer ina brev a cussegliera federala *Simonetta Sommaruga* – cun l'alarm ch'i saja ussa cuntanschida cun il luf ina situaziun che periclitoschia la segirtad publica. Caduff ha vis il video d'Andiast. Per el è il video mo in ulteriur mussament dad in maletg general en Surselva, tar tut la biestga gronda: «Igl è alarmant. Il film è ina cumprova co ils animals reageschan. La biestga mida ses comportament, las vatgas vegnan en general pli sensibilas, pli aggressivas e sa defendan pli tgunsch.» Dal sustegn d'autoritads è Caduff pauc inchantà: «I vegn taschentà, zuppentà ed ignorà il privel – cun la fin finala metter en privel l'entira agricultura en muntogna.»

Er *Adrian Arquint*, il schef da l'uffizi da chatscha e pestga, ha vis il video da Tuor. El n'enconuscha però anc betg las circostanzas en detagl. El manegia ch'ins vesia en quest cas bain co las vatgas-mamma possian sa defender. «Ma

quai na vul però betg dir ch'i saja adina uschia, vul dir che tut ils animals reageschan tuttina. I dat simplamain arments che reageschan pli ferm – sin viandants, sin bikers u alura apunta sin il luf.» Ch'il muvel gross mussa en general in comportament spezial en territoris da lufs saja grev dir, schegea che quai na saja era betg d'excluder. Cun auters plets: «Il luf è simplamain in factur dapli che po procurar per malruassaivladad.» Che cifras u fatgs vegnian taschentads da las autoritads na lascha Arquint però betg valair: «Nus ans stentain per ina cussegliaziun ed infurmaziun transparenta, cun in sistem d'alarm ed uss era cun in sistem d'infurmaziun. Mintgin po ir a guardar tut.»

## Chapientscha per las temas

David Gerke po chapir las temas che tals inscunters pon effectuar tar pasters e purs. «Quellas temas èsi era da prender serius. Ma ellas n'han betg propi ina giustificaziun reala.» Gerke admetta ch'ìls animals possian vegnir pli malruassaivels u gnervus. Però in comportament aggressiv na saja mai vegnì observà durant tut quests davos onns. El numna l'exempel dal Calanda nua ch'in triep è activ dapi il 2012. «Là avain nus l'Alp da Tumein cun vatgas-mamma, ed en tut quels onns n'hai mai dà in cas ch'avess cumprovà in comportament aggressiv dals animals.» La ristga che vatgas-mamma pudessan attatgar viandants saja fitg fitg pitschna. Perquai suppona la Grupp Luf Svizra – sco scrit dal rest venderdi passà en ina comunicaziun a las medias – ch'i vegnia fatg il mument polemica cun svegliar temas envers il luf per uschia far propaganda per la nova lescha federala da chatscha.

## Votaziun per nova lescha

La nova lescha da chatscha prevesa da nov da «regular» l'effectiv era dad animals enfin ussa protegids, sco p. ex. il luf, sche quel daventa privlus per umans ed animals da niz. Organizaziuns per la protecciun da la natira èn cunter quella nova lescha, tranter auter era la Grupp Luf Svizra. Actualmain fan ins quint en il Grischun cun var 4–5 trieps – in

al Calanda, in enturn il Piz Bargias/Ringelspitz, in enturn il Beverin, in enturn Sursaisa. L'uffizi da chatscha e pestga discorra dad ina trentina da lufs.

Per il paster da l'Alp Cuolm, Conradin Tuor, vegni insumma ad esser la davosa stad ad alp. El na chala betg sco paster pervi dal luf, mabain per motivs da vegliadetgna. In proxim paster u ina proxima pastra da l'Alp Cuolm sto però esser conscient che sia biestga vegn en mintga cas confruntada er en avegnir en quel territori cun in u plirs lufs.

**Il video (en duas parts) realisà e commentà dal paster Conradin Tuor è da vesair sin [www.rtr.ch](http://www.rtr.ch)**

## Inscunters da lufs cun muvel gross

(fmr/dat) Las davosas emnas hai adina puspè dà discussiuns en connex cun cas concrets u supponids dad inscunters tranter lufs ed arments gronds. Trais exempels:

La fin dal mais matg è girà tras las medias socialas ina fotografia dad in vadè mort d'in pur a Valendau. Svelt hai dà la curella ch'in luf haja mazzà l'animal. Las retschertgas da las instanzas chantunalas han però alura cumprovà tut insatge auter: Il vadè era gia mort avant, causa malcostas, ed è silsuenter vegnì maglià si per part, sche da lufs u auters animals da rapina n'è betg sclerì.

L'ntschatta da fanadur hai dà in cas – mediamain pauc enconuscent – en Engiadin'Auta nua ch'in vadè è mort e nua ch'ins suppona ch'in luf (u in auter animal da rapina) haja maglià vi da quel suenter che l'animal era gia mort. Ma era il chantun spetga anc ils resultats en detagl da quel cas.

Il matg aveva in pur da Vignogn observà dus lufs ch'eran entrads en il claus da sias vatgas-mamma, in claus gist sper chasa. Il pur e ses figl han pudì spaventar ils lufs. Tenor l'observaziun dal pur eran las vatgas dentant fitg «alteradas».